



重刻守汴日志叙



衡茅之士未始無才而苦於謀
畫之不用稽考之儒未始無學
而患其忠孝之不知夫忠孝不知
則學非所學遑問其事業耶
李君熙亮守汴日志一書世之晚

之者無不惜其才而余獨深服李
君之學明社之移也慮兵糜餉
縱寇殃民不獨汴為可慨方李君
奮義勇殫勤勞於困堞之中至
再至三愈出愈奇非平日謦明
於君臣大義者何以能此志中

附載當日邸報朝廷有汴城
堅守不屈文武軍民忠義可
嘉前論作遠旌敘何至今未行
之旨此李君之所以不遇夫我
國朝崇祀鄉賢李君雖不遇於
一待未如不遇於千載也昔狄武

襄折節讀書志通秦漢以來兵
法岳武穆覽經史恂恂如書生若
李君者雖功名不類亦可云無愧
矣嗟乎聖賢教人無非躬行實
踐自來小人皆極有才而助惡黨
逆為天下笑豈非學術不明之

故哉若李君族孫漱芳明府因差
末滇出是編重付梓余故樂而
為之序

道光己酉秋九月雲南學使者通
政使司參議錢塘陳鴻拜撰



重刻守汴日志序

李漱芳明府自湘奉差來滇因公接見為人忠
寔伉與學養醇粹與余談甚相洽詢其家
閩知乃大梁名族因獲讀其族祖熙亮公守
汴日志一書見公忠義智勇毀家紓難數出
奇策以挫賊鋒黃侍御澍所稱有豪傑之作
均有聖賢之心腸洵非虛語乃車營之計不

不至於勢窮力竭萬死一生終以無濟公之
才不遇公之志少悲矣按史崇禎辛巳春正月李
自成陷河南府殺福王常洵乘勝圍開封周
王恭棖及副將陳永福拒守之冬十一月自成再
攻開封壬午春二月復圍開封總兵陳永福
射中自成目賊攻益急左良玉藉口勦張獻
忠不赴援六月開封圍急楊文岳合四鎮兵次

朱仙鎮良玉見賊盛一夕拔營走襄陽衆皆潰
九月殲撫高名衡議決河灌賊偵知之移營
高阜驅難民數萬決河水自北門入貫東南
門出廬舍人民蕩盡賊浮艦入城無所得拔
營西去日志載崇禎辛巳正月賊攻河南府地拉
李仙鳳出勦河北土寇副將陳永福往雒陽收輯
殘破未回二月初九日賊自雒疾走三晝夜十二日

直抵汴州撫高名衡合文武禦之十七日陳永福
子陳德射傷自成左目十八日賊遁破密縣
走登封十二月二十三日夜自成屯土堤四維汝
西繁塔寺二十四日賊攻東北門不克壬午正月
賊南遁五月初三日賊屯澗李塞十五日左良玉
兵次朱仙鎮十七日賊夜遁二十五日賊復回澗
李塞六月十四日賊掘河口上流七月初三日賊以掘

河不能淹城及礙攻城之路殺倡議掘河者八
月初二日衆請巡撫總兵出師陳永福笑不應
高名衡答以且緩半月初七日高名衡令搜
民糧九月十六日河水灌開封城陷西南賊俱遠
遁東北賊溺死無算周王北渡梁邱陵曰黃河
之沉開秀天也闖寇有智伯攻趙之並年而水
勢石從至於決灌寇營或有局外條陳非

守城者所與同也鄔陵之辨河決有同日志而射傷賊目之人與生年月史與日志皆不合豈射賊者固陳德而歸功於其父耶汴之久圍其罪在左良玉之擁重兵而不速援若高名衡雖用車營之策未必果能剽賊然如其不能勦而安於不剽國家安用此怯夫為嘗析骸易子之日飢而死何如戰而死名衡雖未

倡謀掘河而坐失事機使餐蛆茹泥之衆皆為魚鼈各將誰諉乎若熙亮公者謀雖不用亦足以愧當時之秉國鈞握兵柄而進退失據者已是有序

道光丙戌春仲雲南分巡迤南使者長白佟景
文琴撰

重刻守汴日志序

嗟乎流寇之既至明季極矣而吾鄉實
當賊衝方賊之陷汝而趨汴也鴟張豕突
害蝮滔天謂汴可指日下而平之以百餘
萬強梁之衆攻一區一邑之無助之危
城或敗或遁至再至三而究不能得志

而一時豪杰之士望城守陴厲忠義
忠智勇至於餐蛆茹泥尚延殘喘白
日晝昏寃鬼夜笑終無貳志而卒乃
委於河伯之一邊則汴之北非賊之能
止之也天止之也北非天之肯止之也乃
當事者不用吾家熙亮君車營之計

而自止之也夫熙亮君一總社耳城以極
鎮法公高爵厚祿膺朝廷之重寄而以
餅充餉沒錢募役不恤其家出珠乞師毅
然自任不惜其身凡其枕戈畫痺奮智
勇之略而愈出愈奇者苟非忠義之所
固結何以至此至車營之計論者謂當

時以用之未必有濟夫為人臣子值事勢
艱危計無復之而復鼓其百折不回之氣
以冀天命之一回則又安知其不為胯下之
炮與尺許之墻也若高名衡之藉口於援
兵陳永福之微笑而不應誤國殃民束手
待斃復何為哉復何為哉茲因熙亮君

之族孫漱芳明府奉差來滇得借讀守
汴日志一書哀公之遇壯公之志而不禁
影息痛恨於當日之擁兵縱寇而坐失
事機者也因撮書其大略於簡端而論
之如此

道光丁亥仲春雲南提學使者翰林院

編修同里李棠階拜撰

原序

戊辰冬余再過杞友人侯敬韋持大
梁李君熙亮守汴日志一編示余曰
此李君避亂金陵時病且革口授其
子鑿且戒之曰吾三度圍城中萬死
一生所親歷今雖死不忍忘然信口

追述複語俚字所不暇計他日有爲
我刪定者汝其圖之鑿泣而受之以
付梓今四十餘年矣子盍校之以成
李君之志讀數過乃刪去繁複二千
有餘言稍加竄定嗟乎明季當辛巳
壬午間中原寇訐已極然賊素無大

志唯務殘掠攻陷城邑不能自守雖
烏合寔繁而撲滅猶易乃秉鈞者專
講門戶而置封疆司閩者復養寇氛
以邀爵賞號令不一痛癢不關任賊
出入兩年攻圍三次而無有發一矢
以相救者勢窮力竭舉汴而委之波

臣然後起舊督于繫因付以討賊之
任資既剛懷趣戰復急師攜糧絕一
敗塗地賊于是入關入晉勢同拉枯
不二年而神京遂陷然則汴之存亡
固天下存亡所繫也使當軸者早爲
汴計膺城者盡如汴之堅守賊烏能

得志至此痛定思痛可爲慟哭矣然
汴以孤立危城當方張巨寇軍無銳
士庾無見糧百計環攻人皆死奮斬
首俘馘往往而有至於困甚羅雀慘
同析骸猶莫不北望哀憤思爲厲鬼
以殺賊此亦可見衆志之成城而去

兵去食者之果可與立也且夫王有
根周世忠之勇決張堅張爾猷之謀
略而李君更以精悍之才奮其忠智
不惜貲產不卹妻子周旋於鋒鏑之
間之數君者或爲諸生或爲市儈或
生或死要比立志較然之死靡貳豈

不皎皎與日月爭光而足以愧當時
之操國柄擁重兵者哉嗟乎使李君
車營之計得行通饟饋以活飢軍引
援兵以挫賊勢內外夾擊縱不盡殲
必且潰去而乃有謀不用坐待死亡
徒使五百壯士冒險持糧斬手憤泣

自投隍下而城亦隨之以盡不亦重
可哀乎龐勛之亂圍刺史杜悞於泗
州者凡十月食盡人爲薄餼以給賴
處士辛讜冒圍出入引輯援師卒完
一州汴之危急何減于泗君之智略
不啻如讜謀之用與不用而有功與

無功異焉蓋幸則爲辛讜不幸則爲
李君古今來仁人志士奮區區之忠
以扶傾救禍爲己任而卒于無成賈
恨以歿者何可勝道凡皆李君之類
也讀是編者可以知其入而傷其志
矣

康熙己巳秋八月七日鄞縣周斯盛

此公誤

守汴日志

大梁李光壁熙亮甫編

男鑾節菴甫較訂

孫爲淦山濤甫重梓

崇禎十四年辛巳正月二十二日戊戌賊攻河南府
叛兵共起雒陽失陷所在震動時巡撫李仙風出
勦河北土寇城守副總兵陳永福往雒陽收輯殘
破未回二月初九日甲寅賊乘汴兵盡出疾走三
晝夜十二日丁巳直抵汴梁辰巳時馬賊三百僞
稱官軍到西關居民紛紛入城午未時步賊及大

營隨至巡按下令築門固守賊攻西城祥符縣知縣王燮領衙役兵登城堵禦巡按高名衡守西門守道蘇壯推官黃澍協守西門左布政使梁炳守東門右布政使蔡懋德守曹門東門之在北者開封府知府吳士講守南門管河同知桑開第守北門周藩承奉曹坤左長史李映春率周府勇士八百人登西城守禦下令民間能出城斬賊一級者賞銀五十兩射殺一賊者賞三十兩射傷一賊或磚石擊傷者賞十兩百姓挈刀矢登城者紛紛恐後

十三日戊午生員張堅獻懸樓式

先是城梁口用卓面門版蔽礮矢仍打透我兵手足不能施至是張堅獻懸樓式用大柏木三上排橫木十餘如筏其廣可跨五梁或三梁出梁外四五尺每樓容十人賊臨城下我兵從上用火礮砲石擊之樓堅厚礮矢不能入又高出能蔽身我兵得展手足推官黃澍命快手朱光祖督造一夜成五十餘座分置城上

十四日巳未擊殺賊甚多賊忿射終日

先是賊穿城六孔伏其下我兵城上擊之不及今
從懸樓視而擊之無不中者賊怒甚射終日箭插
城垣如蝟

十五日庚申賊昇雲梯百餘座有高至城之半者置
濠邊將來攻城我兵擊死昇大雲梯賊四十八人
朱之滄縋城殺賊得首級一顆

賊以四十八人昇一大雲梯將抵城下我兵放大
砲擊之俱死隨發萬人敵火礮悉燒之并燒死紅
甲賊首一人之滄宗生員也縋城誘賊與言斬首

一級賞銀五十兩

十六日辛酉總兵陳永福夜斫賊營直抵城下賊掘
城見石礮

陳總兵在雒陽聞賊攻汴兼程赴援二晝夜至西
關三鼓繇孤魂壇穿賊營進小西關斫死賊無數
遂統騎兵至城下巡按令永福子德看真開水門
放入於是人心鎮定步兵貪取賊遺騾馬次早尙
在小西關接戰被傷頗多一兵登屋手刃七人賊
不敢近亂箭射之乃斃西域有石礮十八層賊見

而懼遂不敢攻

十七日壬戌守備陳德射傷闖賊李自成左目陳兵時出城擊賊

闖賊雜衆賊中至城下窺視陳守備射之中左目下深入二寸許抱頭驚擁而去始知爲闖賊也闖瞎子之名自此始賊時出挑戰陳總兵發卒迎之至濠各退賊意誘我兵深入以擊之我兵亦以賊衆我寡不中賊計也著藍甲賊首一人忿恨躡追爲陳兵所斬

十八日癸亥黎明賊前鋒西向邊巡終日至夕遁去時傳左兵將至又傳保兵渡河賊解圍遁破密縣又走登封

此第一次闖賊寇汴無曹賊也精兵不過三千脅從之衆不過三萬乘汴空虛攻我不備耳

賊羅汝才混各曹操

十九日甲子祥符縣知縣王燮督衆修葺城垣晝夜兼功十日告竣

三月初一日丙子各官募兵選將添設營伍爲未雨綢繆之計

巡按高名衡添設清真營選將陳濟民中軍李文
華領之守道蘇壯設道標營中軍趙世忠哨官蘇
禎領之

祥符縣知縣王燮亦於是日創立社兵社長副選五
總社

按省城八十四地方立八十四社擇民有一二千
金產者出兵一名或兩家合出一名萬金產者出
兵二三名巨商亦然每社社兵五十名擇殷實有
素行生員二人爲長副領之外選總社五人按五

所五門各置一人統之北門後所總社潁川郡王
在鑰南門前所總社原武郡王第四子鎮國將軍
肅湘西門右所總社生員曹鼎東門中所總社宗
貢生朱在鈺曹門左所總社舉人常惺凡四千二
百不餉之兵諸上臺時加勸賞長副各銀一兩紗
一端總社銀五兩緞一端各送匾獎勵無事則團
練習藝有事則登陴守禦且得資其物力以濟城
守之用也

十二月二十日辛酉城中喧傳賊將至左所總社關

各官令各社另擇

時前後中右四社俱有總社修飭器械練習兵士各有紀律獨左所總社常惺謝病督理無人因命各社公議另報

二十三日甲子賊遣其黨貼偽示於曹門祥符縣夜召墜為左所總社

是日未時賊七騎飛奔曹門貼偽告示二張於柵上守關兵追之莫及是夜賊大營至闖賊屯土堤外應城郡王花園內堤去城十里曹賊屯繁塔寺知賊

必攻東城王知縣夜半遣人召墜為左所總社使者誤召墜父父適病辭王知縣大怒鄉紳張文光謂墜曰召墜非召墜父墜次早同見知縣遂領兵符統左所社兵各照汛地防守曹門至北門為汛地

巡按任濬守曹門開封府知府吳士講推官黃澍協守曹門祥符縣知縣王燮守北門管河同知桑開第周府承奉曹坤鄉紳張文光協守北門左布政使梁炯守東門都司譚國禎協守東門守道蘇壯守西門巡撫高名衡守南門赴援曹門東北角副總兵

陳永福守南門赴援曹門

二十四日乙丑賊攻東北一面曹門至北門丁兵失利降賊未時北門失月城

初督師丁啟睿領兵三千自南陽赴汴就濠邊築壘防守賊至一戰輒敗兵悉降賊北門月城爲賊所據有上至瓮城者守北門回營加銜都司李耀率數十回兵各持大柳椽躍過瓮城盡擊賊落城下王知縣急擲火盡焚之曹承奉率周府勇士用土築門至其半門上鑿二孔時有賊來折門者從

孔中鉤住斬其首賊遂不敢近

二十五日丙寅下令民間有男子一人不上城者斬賊驅民負門千餘掘城城上用磚石擊死甚衆照賊掘處擲柴燒之火晝夜不絕自曹門至北門環亘十餘里

賊至城下磚石火藥併擊之有穴城入其中者磚石不能擊繫柴加烘藥下燒之賊自出周府出葦柴官府買藟柴無幾強半出之社中

二十六日丁卯賊攻東北愈急社兵有殺賊者卽報

開封府及總社記功

東北角賊掘一大孔用大砲攻城傷兵頗衆巡撫來赴援城上用一大砲擊殺賊更多

二十七日戊辰賊率衆數千於曹門北濠外對城扎營掘城一大孔陳總兵赴援與賊晝夜力戰

賊折城開二丈餘大砲十餘鎗放步賊先登馬賊繼之我兵亦放大砲十餘步賊至半途者一擁而下死者無數每夜對攻數十次至曉稍歇

二十八日巳巳夜城中失火黃推官詣失火家立逮

其人彙示

齊承差家牛人王才醉後向火延燒草屋三間一

城驚惑黃推官恐姦人乘機斬之以狗沐人謂佃戶爲牛人

二十九日庚午下令爲衆設食巡撫三鼓發硃帖令

黃推官速撥牛兵三百赴援東北角隨發總社兵

卽牛人

曹門牛兵僅二百七名墜每社撥社兵十名又發

令箭向東門賊所不攻處於中所總社撥社兵二

百名卽刻赴援東北角墜思牛兵數少不足用遂

設錢千緡置城上臨時雇壯丁每次人給錢百文餅四個百姓蜂擁願雇雖日用數萬人不缺巡按聞之喜曰此化少爲多之計每一處告急或用百人二三百人悉爭先願往鑿日製厚餅二千個送城上至二月初二日凡十萬有奇巨商巨族各送餅千百不等

崇禎十五年壬午正月初一日辛未賊用陰門陣城上以陽門陣攻之多備鈹櫬每日就賊掘處城上分中掘透

賊驅婦人赤身濠邊望城叫罵城上點大砲悉倒洩城上令僧人裸立女牆叫罵賊砲亦倒洩每社預出鈹櫬五百件鐵索水桶百餘件照賊剗處計某時起約一日半十八時方至城墻中城上分中掘透其孔以磚石長鎗擊刺賊不能存後賊不剗直穴更旁剗小穴以避之

初二日壬申賊墊柏臺城上築方臺保督送蠟書賊伐柏墊數臺長十丈餘廣五丈餘高可三丈二晝夜而畢上容百餘人放大砲攻城城上用方木

長丈餘廣厚二二尺者築一方臺高出柏臺三丈
置大砲擊之柏臺之賊悉死生員張爾猷獻懸砲
式立長柏木三如鼎足懸大砲其上望柏臺擊之
連斃數賊保定總督遣兵扮乞丐送蠟書云大兵
卽至巡按任濬傳示城頭群情愈定

初三日癸酉闖賊誘殺丁兵三千杖賊首李狗皮四

十

丁督師兵三千旣降賊闖賊恐爲內應誘至老營
點名俱縛手斬擲蓮池內賊頭目李狗皮攻北門

闖賊怒其弗克責之

初四日甲戌雪取民間氈被二萬件爲兵禦雪屢奪
賊洞三十餘處

巡按召壑曰大雪濕衣兵寒難忍須各給綿被或
氈條禦之非立辦二萬件不可壑曰若逐戶求之
緩無濟事但嚴勅總社卽社長副可立辦也巡按
卽出硃牌仰李總社卽刻取綿被氈條二萬件爲
兵禦寒如違定以軍法從事壑持立雪中衆環視
每社兵一名出十件一當店五十件巨商三十件

牛兵亦歸告主人出十餘件不等未及晚城頭山積次日雪霽巡按仍召墜領給原主賊剗城成洞我兵連日在城上分中掘透直入逐賊出據之因洞之大小容兵多寡賊有復來者擊之不能入

初七日丁丑懸二千金賞奪一巨洞

賊在曹門北心字樓下

城頭原依二十八宿設樓

掘一巨洞我

兵城上掘透賊在內死拒兵莫能入巡按初懸千金賞未有應者復硃書有能奪此洞者賞銀二千兩并銀置洞口上朱呈祥領百餘人先用柴懸入

洞中之半加烘藥隨以多柴填燒極熱賊不能存乃灌水百餘斛帶短刀跳入容兵五十餘人前後凡三十六洞俱以兵守之賊竭十五晝夜力盡爲我用於是人心愈奮

初八日戊寅雪夜出師襲賊營斬獲甚多

是夜三更大雪巡按任濬令選奇兵五百繇水門衝枚出傳令總社約以暗號奇兵過濠外分數處砍入賊營賊驚起奇兵退走濠內賊躡追各洞兵齊出斷賊歸路奇兵復回合殺一處斬七百八十

三級推官黃澍同壑立城頭渾身雪厚寸餘竟不自覺

初九日己卯柴將不敷社長副下地方搜柴

周府葺柴令宮人運出圍外騾車數輛晝夜載運壑每日五鼓喚鄉約撥地方四輪車十伍輛載周府及社兵柴每一社兵出柴五束十束後至二三十束共得十二萬束有奇至此將不繼社長副持令箭各搜本地方或一家三五十束及百五十束者惟曹門最多又得十餘萬束

初十日庚辰闖賊殺掘城賊

數十賊持刀驅賊負門持短楸入原掘洞口我兵在內奮擊莫敢近欲另掘又爲懸樓磚石擊走回至濠邊持刀賊乃盡殺之屢驅屢殺如是終日死者萬餘

十一日辛巳添築城牆七生誑賣牌坊折上方觀音二寺磚

東北一面城牆薄者添厚二丈命廩生盧可傳監修生員宋體仁李景等七人呈理刑廳有隆慶癸

卯科聯名坊一座係生等祖坊今願賣但受半價黃推官賞銀二兩令總社折來估價暨卽役兩地方夫二百人折之上有題識乃布政司官錢所建七生姓氏亦不同因白刑廳以公家物今日爲公家用七生不得而賣亦不得而輸也於是各土臺俱遣人折舊坊暨祖坊二座係勅建者亦不免先是周府委閩書堂買磚百姓運至城上一二片者給錢三五文每日運者不竭至是附近磚盡矣乃令盡拆上方觀音二寺磚擊賊惟殿宇拆外半

壁而已

十二日壬午賊併力急攻添築城牆七層陳總兵騰下放砲擊死賊萬餘

陳總兵守大洞口連日與賊戰賊齊放大砲百餘

步賊隨砲聲上城

城被砲打城頽比如坂

城上砲連倒洩三五

尊總兵置一大砲於勝下命速點曰忠臣不怕死砲竟不倒洩百砲萬弩齊發打死賊成一血衚衕賊砲中傷我兵亦多我兵愈厲擁奮而前對陣處無一線之隙急取王府及各寺廟門千餘添築城

牆一層打透一層築七層乃止

十三日癸未賊放地雷自斃萬餘

賊於東北角之南陳總兵之北貼城牆外壁剜一穴約廣丈餘長十丈餘每日以布囊運火藥其內無慮數十石置藥線二長四五丈大如斗是日馬賊千餘俱勒馬濠邊步賊無數已時點放藥烟一起迷昧如深夜天崩地裂聲中大磨百餘及磚石皆迅起空中碎落城外可二里馬步賊俱爲齏粉間有人死馬驚逸者城上城內未傷一人裡半壁

城牆僅厚尺許卓然兀立此真天意非人力也賊於是有退志

十四日甲申賊徘徊往來攻打稍緩稽察社兵射死磚石擊死併斬獲賊共七百四十有八東門馬將圖殺范文舉

是日賊意懈攻打俱緩惟砲聲未絕有遠入城中十里者鉛子重可二三十斤范文舉墜御車人有勇力被賊擄去奪大黃馬一匹龍鱗甲一副銀八十二兩斬賊二級奔回東城下守東門馬將遇獲墜

至東門與譚都司驗明回曹門申明巡按巡按批
許縉入至東門見梁布政使梁不允曰不曾有梁
布政三字復回白巡按日已暮馬將利其有夜殺
之竟不可得而問也

十五日乙酉賊解圍南遁

老營賊五鼓拔營攻城之賊未動午時賊馬飛奔
呼衆賊速走自西北往東南揚塵蔽日

十六日丙戌任巡按令總社啓門鑿發鉞極啓之隨
黃推官王知縣單騎視賊營日暮入城

鑿令往來軍民併力齊發片刻卽開鑿騎馬戎服
前導黃推官王知縣各騎馬行周府方丘二小內
使亦同往周視賊營牛驢頭皮腸肺間以人屍穢
滿營內外約廣八里長二十里以繁塔寺爲聚糧
之所糧深三尺

十七日丁亥收難婦點牛隻

是日午時賊所遺婦女二千三百餘人悉歸城下
因收月城內禁兵民掠奪俟其親屬認領陳兵驅
賊及民間遺牛三萬餘頭任巡按欲半價買給民

耕黃推官坐城門下人給小票令墜門內驗票收牛墜告巡按曰此牛賊與兵皆不暇餵唯食草根泥水腹有宿泥不出十日必死巡按召獸醫問之亦云然事遂寢墜夜送米二石麵五百斤令難婦用十鍋作食苦無柴吳知府有柴千餘束未用墜往取給之次日除親屬領去外尙存三百餘口悉送尼菴每日人給麥一升

十八日戊子閱視城垣分在修葺

黃推官召墜騎馬同出門外王知縣張伴讀俱往

自曹門至北門十餘里凡剜三十六處幾爲平地尸橫遍野斷髮滿地死傷者無慮十萬令地方夫掩埋十日未畢各分任修城堡黃推官命墜修曹門以北第七堡給官銀二百兩墜辭出私錢每日雇匠役百人社兵助工百人夜亦知之大洞廣二丈小洞七各丈餘令家僕數十監視填實城壕口五十七凡五日夜用錢三萬八千二十三日癸巳告竣

十九日巳丑四將領兵赴汴

馬丁張賀共領兵三千自汝寧府赴汴悉令沿濠
結營看守修城修完仍遣之去

此第二次闖曹合攻汴精賊不過三萬脅從之衆約
四十餘萬攻城死者幾半二賊到朱仙鎮點閱精
兵除死亡外重傷者二千八百七十三人俱以方
卓仰鼻而去左鎮駐杞縣二日追至偃城白沙河
與二賊連戰十有八日屢勝之已而左鎮回襄陽
二賊走項城殺西兵三千
總兵左良玉兵號十萬賊畏其名前之解圍蓋聞

左兵自東來也惜其遽回襄陽不能撲滅致有第
三次圍城之禍

二十七日丁酉王知縣召鑿議灰

先是賊甫去鑿卽告黃推官曰修城不患無磚患
無灰可取所拆牌坊下及寺廟中石燒之王知縣
令立五十餘窰而汴人俱小窰每窰不過百斤日
不足用因召鑿再議鑿家有灰三千餘斤灰販魏
德欠鑿灰一百二十包約一萬五千斤鑿盡出助
可供三日之用黃推官王知縣竭四十晝夜力躬

視版築城垣一新賊偵者見金城如故疑有神助
賊去之夕壑至北門見王知縣默然不語詰朝王
知縣至曹門謁兩院出召壑勞之曰我在北門不
知曹門事適見兩院俱言守曹門全得總社力晝
夜策應甚爲勞苦

巡撫高名衡獎語罄私囊以濟公率衆社以成城功
在社稷允宜首題

巡按任濟合巡撫高名衡上疏曰總社李光壑統領
社兵戢和衆志日有斬獲更爲衆設食始終不懈

五月初一日奉

聖旨特賜拔貢

王知縣行取赴京壑辭總社王知縣許焉旣而曰此
曹門黃年兄地宜往商之及見黃推官黃曰李總
社有豪傑之作爲有聖賢之心腸守城視爲左右
臂豈容辭去

闖曹二賊連陷十七州縣三月二十二日寇睢州徐
吏目開舊東門策馬先逃城遂陷賊入城搜掠財
物未殺一人

三月二十七日賊攻陷歸德府夷其城殺慘
四月十二日合土賊袁時中抵杞縣夷其城闖賊欲
袁賊先攻汴袁賊懼夜半拔營東去闖賊追至毫
州連戰敗之復歸圍汴

四月二十八日丁卯諠傳賊將至悉登城守禦巡撫
高名衡守西門守道蘇壯協守西門左布政使梁
炳守東門都司譚國禎協守東門總兵陳永福守
南門開封府知府吳士講協守南門管河同知桑
開第守北門署軍捕同知蘇茂灼協守北門推官

黃澍守曹門兼守北門

五月初二日庚午賊至城外

賊頭哨先到馬賊徘徊土堤上步賊於堤外曳枝
揚塵作疑兵狀

初三日辛未賊老營至城西屯閻李寨

閻李寨距城二十里闖賊屯其中衆賊頭目環營
其外從廣約十五里曹賊屯橫地鋪相去不遠
初四日壬申賊後隊俱到堤上賊馬往來不斷時有
遊騎下堤將至城而旋步賊下堤刈麥我兵亦出

城刈麥

濠外堤內俱有麥將熟賊數十百人爲羣分頭刈麥兵亦出城爭刈賊東兵西兩不相值偶遇時兵多賊卽走賊多兵亦趨避自此至十三日辛巳附城麥俱盡僅存土堤邊麥矣

十三日辛巳左總兵及丁楊二督師領大軍援汴前鋒至朱仙鎮賊遣三千騎往偵

十四日壬午賊焚燬餘麥女

近土堤未刈之麥也

十五日癸未左總兵屯營朱仙鎮

總兵率大軍收土寇劉扁子等連營四十里號四

十萬賊騎三千俱被擒斬女

十六日甲申夜闖賊踉蹌移營馳拒左兵

闖賊知偵探賊被殺懼甚盡棄營中器物而走

十七日乙酉陳總兵遣卒偵探賊營

難民自西來咸云賊已夜遁陳總兵選健卒徑探果空營滿載遺物而歸

十八日丙戌悉放民出運賊營物

賊遺麥豆甚多魚雞鵝鴨猪羊之屬及金銀器物
牀帳車輛衣服無不備其精好者盡爲兵有民日
擔糧二回自此至二十三日兵民約得麥豆三萬
餘石

十九日丁亥齊世相自賊營歸

世相上舍也負才學從商丘梁縣令遊二月間爲
賊所掠凡賊營動靜悉知之自朱仙鎮扮乞丐至
城下吳知府雅識之開門放入

二十日戊子巡按嚴雲京遣牌過河推官黃澍往迎

是日午時二承差持巡按渡河牌自柳園渡河到
城下黃推官隨過河往迎鑿選社長副八人領社
兵一百二十人從之鑿送至河上

二十一日巳丑黃推官見巡按於封丘言賊狀甚悉
巡按渡河不果

推官欲巡按過河彈壓巡按意不決而止

二十二日庚寅日將暮黃推官引兵過河鑿同都司
陳篤忠迎之河上

二十三日辛卯丁營將官楊維城自朱仙鎮逃回至

西城下言丁兵失利左鎮南去賊將復至

維城至城下叫門內丁營中軍吳國璽識之白巡撫總上言朱仙鎮失利甚詳賞酒食及錢與公文令投丁督師處後仍有回文至

二十四日壬辰賊塘馬先回營

營中諸物已盡惟麥豆猶有存者兵民往取之見賊馬奔回

文

二十五日癸巳闖賊老營復回闖李寨

賊馬往來堤上步賊驅民刈堤外麥打糧賊三二

百爲羣走五六十里外惟曹門外止二十里懼土兵黨一龍截殺不敢前

二十六日甲午五門俱放兵民出城打草採菜

五門俱用磚土掩其半留其半仍備磚土於旁時啓閉嚴出入兵刈草飼馬民刈草一擔賣錢二百後至三四百野菜堪食者每斤賣錢五十文後至五百自甲午至庚子凡七日俱如是

六月初四日壬寅巡撫捕姦細霍賣婆搜金銀六錠寸斬於市

霍賣婆引一少婦假採菜出城送至闖賊老營霍能言王府事闖賊喜給金四錠重四十兩銀二錠重一百兩且囑送王府宮女一人到營中給銀千兩霍進城有惴恐狀內丁營都司張吾銳搜筐中得金銀呈巡撫正法遂禁婦女出城

初五日癸卯斬經紀李賸虎於南隅

賸虎名遇春開國戶能領御諸經紀自四月二十八日閉門至今銀一兩賣麥四斗遇春暗令騰其價每兩二斗黃推官親詣南坊擒遇春斬於市遇

春臨刑云有麥八百石願以贖命黃曰不要汝麥只要汝頭遂斬之於是麥價如故

初六日甲辰至十六日甲寅兵民糴糧者五鼓至晚擁集不散

十四日壬子賊掘河口上流

賊用千餘人掘河使逆流而上水勢緩高不過五寸三日流滿海濠更勝十萬甲兵

十七日乙卯五隅俱閉戶絕糴

客糧已盡民糧不賣從此乏糧矣

二十日戊午巡撫發銀差役張四教楊三樂買糧定價麥四兩一石雜糧三兩一石

二役訪有糧家輒往與銀或一百石二百石三十石令送西南二坊時雖苦累尙可支吾

二十一日巳未黃推官發銀委總社買糧

鑿具申文糧從民便不可定價惟取其足以養兵民若干買若干賣無損於兵無損於民無損於官黃推官淡然之批准照行

二十二日庚申買糧二百餘石

鑿訪有糧者踵門勸諭麥一石給銀五兩或五兩三四錢雜糧一石四兩或四兩五六錢仍僱役夫運至曹門坊付經紀賣

二十三日辛酉兵民赴曹門坊糴糧

兵民及婦女如蟻有竟日不得糴者有躑傷者

二十四日壬戌分定散糧期三六九日散曹北東三門兵糧餘日散民糧兵下城者卽斬郡王青矜各從厚給於是兵民不相擁日午糧卽散盡

二十五日癸亥委劉社長總管賣糧錢總社專力買

糧

市僧以賣糧錢付社長劉光祖仍易銀付總社買糧城頭積錢二日無易者時民間銀一兩換錢一千八百鑿因囑光祖每銀一兩多給百文於是換者遂衆有預交銀者光祖會計甚當

二十六日甲子推官黃澍結義勇大社

豎大白旗於曹門上大書汴梁豪傑願從吾遊者立此旗下

二十七日乙丑

郡王鄉紳士民商賈無不願入社

四方豪傑及土著智勇之士悉至約得萬人

二十八日丙寅刑牲祭

關壯繆侯與衆飲血酒盟

黃推官發銀十兩命總社設祭鑿令生員張爾猷市羊豕雞酒等物是日拜告關祠以大銅磬盛酒鑿手割雞血其中徧飲之

二十九日丁卯製旗幟備器械編隊伍給信票

黃推官發銀二百兩令總社製旗五百餘面限二日成令舉人朱恕楊銓鄉紳張志瑄籍記人給社

票一紙凡腰間繫無憂絳者皆大社中人也
二十日戊辰旗幟器械備

器械逐名領給旗號按五方色整齊鮮明

七月初一日巳巳揚兵城頭謁見巡撫巡撫悅甚備
盒酒銀牌郡王鄉紳總社及各頭目俱下馬飲三
爵給銀牌一面

曹門展營前茅已至西門見巡撫中權尙未盡起
周城四十里人馬絡繹旌旗蔽空陳總兵稱賞不
已

初二日庚午朱舉人造冊分職掌定五營頭目

中權舉人朱恕楊銓鄉紳張志瑄統領後勁生員

許如瑄員致雨統領前茅浦江郡王闕名原武郡

王第四子肅湘統領右翼遂平郡王闕名寶寧郡

王長子闕名統領左翼南人守備程丹統領皆徽

杭商人

初三日辛未闖賊怒殺主謀掘河賊

賊恨水不能淹城反將海濠注滿廣處四五丈深
三丈餘雖欲攻城不能飛渡又撥萬人取土填故

道因殺主謀賊

初四日壬申造冊成職掌悉定

左參謀宗室朱了了右參謀山人朱洞左中軍官鄭雲鴻右中軍官張時雍監紀官吳之琮紀正張爾猷耿玄總社兼管總巡事李光壁客將謝廷璽

初五日癸酉合營大操

在北鹽坡內操終日始畢

初六日甲戌請巡撫上方寺閱操

寺外高處置巡撫坐中軍白下操合營巡撫曰三

日新兵焉能合營過堂閱視可矣中軍又曰昨日已下過營請先閱操後過堂巡撫見練習頗熟喜曰此勁旅也賞銀二百兩

初七日乙亥出師擊賊大勝之

寅時發兵黃推官領總巡督陣門外逐賊至土堤外斬首四十一級生擒十二人奪馬九匹布帳器械百餘件射殺三百餘人未暇割級此圍城來第一大捷土堤賊敗走大營賊喊聲將近收兵進城獻巡撫驗功賞銀三百兩自此每日出城往往有

小捷

初八日丙子陳總兵置酒晏勞將領以牛酒飯餅大饗士卒夜出南門劫賊營斬二百餘級

是日五鼓劫賊營於土堤上盡殺窩舖中賊割其首收其布帳食物從此各營或交戰或劫營無日無之

初九日丁丑東嶽廟施粥三日

城中婦女數十萬晝坐衢路夜卽臥地死者不可勝數黃推官見之惻然選鄉約五人社長十人椽

史三人施粥於東嶽廟三日用米四十五石

十一日己卯義勇營擊賊生員王有根殞焉

王有根鄉紳之璽之子開封府學生員也背坐纛奮勇直前過土堤被賊砍倒社兵奪屍舁回黃推官備棺葬城下爲文以祭之璽止一子家亦貧薄巡撫推官各贈贖五十兩

十二日庚辰巡撫手書富人姓名凡十八家共借銀三萬兩立完一萬

十三日辛巳盡以前銀犒軍

得河北檄云十四日援兵渡河城中悉發兵接應故用此賞

十四日壬午東北角烽火連起未見船隻人馬總兵劉澤清過河擊賊兩日皆捷營中忽自驚擾仍退還河北

十五日癸未鑿創車營式欲夜出北門直抵黃河接濟河北兵馬開運糧道

用四輪車一輛車廂上一面從橫釘欄木六根高八尺長與車齊以榆柳版厚三寸者釘欄木上版

中作五六小孔看外放鏡每車一輛用大麻搭二大罈六以四盛水二盛火藥載大砲一臨放安車輪下鏡四杆用十二人四人推車八人放火器備水與麻搭者此係木城防賊用火箭也自北門至朱家寨僅七里每里三百六十步每車長兩步不等左右分列兩行在右者釘右廂在左者釘左廂各一千二百輛共用二千四百輛先於城中演熟推車之法乘夜令識路人爲導開北門一擁便到朱家寨賊卽聞之且驚疑不知何物賊來攻時營

盤已定有大砲鳥銃賊不得近城上設左右兩翼
援兵每翼用大砲手二百人安大砲百位賊攻車
營之左左翼放大砲擊之攻右右亦如之大砲可
及十里七里車營儘可防護此車借之民間一呼
可集且不損其車事畢還之壑家製成一輛十五
日晚呈黃推官驗看并言推法用法黃甚喜賞鑿
造車家人各銀牌一

十六日甲申推車式上西城同黃推官見巡撫巡撫
詳視大喜賞大銀牌一命五門速如式分造

曹門造八百輛南北東西四門各造四百輛

十七日乙酉賊剗土城周圍俱盡

土城舊外城也去城五里在土堤內

賊剗平土城如壁立前此猶間留一段至此盡矣
下掘濠溝以防出入間留一二小路晝則下土城
哨探夜卽用草塞之周圍俱步賊每夜發喊鳴更
火光不斷馬賊俱在大堤上

十八日丙戌曹門將官高祿領兵夜劫賊營被賊斷
雙手衆兵奪回昇至城上黃推官一見放聲痛哭
給麥一石米五斗銀五十兩

回家一月全愈河水衝城後猶能渡過河北

二十日庚寅道標營中軍周世忠罵賊而死經綸社社副并大漢爲賊擒去

世忠本西關市肆人有膽氣勇力絕人出城擊賊以馬蹶被擒賊逼之降世忠大罵不屈賊怒磔之武生井澄狀貌雄偉人稱爲大漢善弓馬是日同出亦被擒不知所終

二十二日辛卯曹門東北角場一段斬管工衙役徐文科及作頭張二

先是此處本一郡王監工所修洞內未用磚土填實僅以柏木門板塞其中連日大雨遂壞殺二役連夜修完賊不知其故訝曰又開一小門何爲於是城上安一小門以疑之

二十四日壬辰賊放毒烟燒葦草

曹門外南北隅有葦坡數十頃兵民日出刈葦賊亦刈葦飼馬是日賊用毒烟燒三日夜城上見烟直起聞氣臭知有毒各含檳榔甘草置大缸百餘於城頭滿注水及甘草解毒之藥毒烟不能爲害

二十五日癸巳賊移三營於曹門外

正東土城外三千賊扎一營名新營東北土城外石牛角地方扎二營偽副將羅賊偽都司張賊

二十六日甲午總社繳回推官原發買糧銀一千六百兩

前此猶曰少糧至此將絕糧矣無處可買遂將銀繳回計三十五日凡買糧一萬二千四百七十餘石止銀一千六百兩循環運轉

二十七日乙未賊斷送麥壯丁五百人手悉至門外

壯丁五百人各負麥三四斗自城西青孤堆過河夜走大堤外經賊老營被擒盡去雙手驅至西門望城跪拜投濠死者半進城者半闖賊斷手必至尺部曹賊止斷手指一半間有斷中三指尖者猶不至為廢人

二十八日丙申申請巡撫給義勇大社總巡劄付

照得義勇已成營頭各官俱有職掌軍事浩繁必有分理察得貢士李光璧心細于髮才大於淵急公敏能多謀善筭合行委用為此仰本生管總巡

事務一切軍容之不整器械之不精人材之不堪
事機之不便者本生不時巡察務使人皆超距之
雄營成細柳之壘事平叙功本生其首也勉之
二十九日丁酉製車營布帳及食用小事
礬白布爲帳凡八十餘件一切器用俱備

八月初一日戊戌演車營

於東鹽坡列車成陣願爲前驅者三千餘人

初二日巳亥請高巡撫陳總兵蘇守道吳知府曹承
奉同看車營擇初二日庚子出師

車營內安大帳房巡撫上坐總兵僉坐餘以次列
坐細閱車營皆曰好適有卒於城外生擒一賊至
極肥大卽磔車營前黃推官白巡撫曰今民間十
兩銀易麥一升不得乘此時人尙有力猶可驅使
推官願以車營出城取糧不用官軍一人只義勇
大社兵足矣城以外推官與李總社任之但祈總
鎮發火器手四百城上左右救援總鎮微笑不應
巡撫問壁曰道路豈無崎嶇乎汝能熟識乎壁曰
自北門至河上大道如砥路旁草莊被賊前已燬

盡有大樹百株令健見上樹遠瞭賊來某處卽大呼某處有賊巡撫曰砲揚起放無力七里遠能擊死賊乎壘曰揚頭大砲十里外恐不能命中車營甫抵河上每車取一人得二千四百人倚河爲背水陣信砲到城上城上放砲以四里爲的河邊放砲擊三里遺善泅者踰河請援河北兵有不飛渡來乎河北兵直抵濠外札營連放兩日夜大砲賊不能近車營河北兵有不盡渡乎河北糧有不多運乎不戰功成賊惟喘喙遄遁賊未至時壘曾詣

河上閱視此路並無坑穴兵法云知彼知己又曰得地利者必勝此之謂也巡撫曰西兵前有信八月出關中秋前後可到吾兒前月初四日進京面聖請援料今已到河北且再俟半月何如衆皆默然黃推官拂袖出帳外抗聲曰事不可爲莫若澍盡焚其車跳入火中作厲鬼以殺賊吳知府出慰曰半月亦不爲久姑待中秋未遲黃曰此時人有日食半殮者猶可用力若半月後盡成餓殍能驅餓鬼而用之乎無論中秋卽重陽亦無援兵也巡撫

聞而不語乘馬上西城各官俱回汎地竭二十晝夜之力竟成壽餅矣

初三日庚子五門夜巡撥兒兵俱割首級獻

周王報功每一級要賞錢三千文

一門有七八級或二三十級者五門已時齊至端禮門要賞賞訖買民間食一顆猶直銀三四兩數目如是王與巡撫傳令擒活賊于是無獻功者前此皆割負麥民或出城民首也

初四日辛丑巡撫買糧不得盡委富民巨商富商買追不出者發鎮標撫標各營將校自追各有折數坐名某人買糧若干石每石初折八十兩後折一百三十兩追完萬金者生員張養蒙崔應星也應星完萬金猶不免一死貢生崔應朝完七十五石其人竟無下落有完三五千兩一二千兩者亦多不完者營官百方煨煉死而後已每至欠糧家先捉幼男女以大鍼數百刺其膚號叫冤慘至九月十五日各營押追者仍紛紛未已聞巡撫至九月心亂亦不知其詳任群小十餘輩內外作崇殺死

富民殆盡

初五日壬寅推官出示令民間報糧親至一、二家驗視管糧通判彭士奇往搜之獲糧一石賞報者三升取其十之七八隨予直胥役兵士隨去敢有取一文錢者立死如是者旬日至十五日後搜亦無也

初六日癸卯周王令宋張二伴讀搜王府及民間糧搜出照巡撫例一斗給銀四錢搜不出亦無苛求

初七日甲辰巡撫發令箭搜民間糧

一將弁領數十餓兵持令箭直入人臥內囊篋盡開至掘地折屋破柱以求有一搜竟日不了者有一日搜六七次者若糧盡取去揭一帖於門某日搜某糧若干惟郡王府第僅免一搜然猶閉門以避雖管理府事鎮國將軍無不搜至八九月之交則糠粃鹽醬油醯無不搜矣兵士或假令箭沿門搜奪搜獲隨予銀幾分滿城紛紛俱搜糧者往來巡撫莫克禁亦不自知令箭幾枝命黃推官覈數

而已

初八日乙巳人相食

有誘而殺之者有群捉一人殺而分食者每擒獲一輩輒折脛擲城下兵民競取食之至八月終九月初父食子妻食夫兄食弟姻親相食不可問矣十五日壬子巡撫以中秋大賞各營總兵令各營鼓吹終夜兵士皆坐梁口上飲酒高歌

鎮標營賞銀一千兩撫標營六百兩大小各營二三百兩有差共賞一萬一千三百兩有奇

十六日癸丑令鄉約報民間牛騾馬驢充餉

鄉約開數日報理刑廳卽遣人召其人送城上給價每給兵肉一斤準糧一升五日俱盡矣

十七日甲寅開五門放婦女

先聞闖賊有令窩舖內藏匿婦女者斬放出三萬餘口任其所之有持數升糧復進城者

十九日丙辰壘申文理刑廳連年河工未修今賊又掘開隄防每九月十七日俗傳河神生日必發水若微流漸至猶可無患萬一怒浪滔天爲之奈何

鑿備木料人工願造小船一隻以防不測伏候裁奪理刑廳批造船爲今日第一急務木料人工本廳自備借重門下督造可也一隻之外不妨多造黃推官發榆皮四十斤麩麩二十斤爲匠作食鑿復措雜糧四斗南瓜十個木匠八人鐵匠一人六日造船一隻廣一丈二尺長三丈可容百人極堅緻篙櫓皆具然力已竭不能多造撥兵三百人舁至曹門九月初二日出城擊賊欲度濠復舁置濠中作橋以通往來兵收盡日已暮黃推官命樂把

總看守椽二杙以鐵索繫之十五日夜水至樂把總乘船走黎明聞往繁塔寺莫能追也

二十日丁巳食牛皮皮襖

二十一日戊午取市肆藥材

山藥茯苓蓮肉爲上巡撫盡舁上西城次則何首烏川芎當歸廣桂芍藥白朮地黃黃精門冬菴蓉兔絲子車前子又其次椽子皮杜仲川烏草烏柴胡白芷桔梗蒺藜無不食之

二十二日己未民間食水草水蟲糞蛆膠泥新馬糞

城四隅有鹽坡水深三四尺忽生纓絡草鮮嫩可食男婦入水中隨取隨食水綿本不堪食亦強吞之水中小紅蟲他時取以飼金魚者皆縫紗布爲囊取之名曰金魚子入蔥油炒食味似魚米每斤賣八百錢後至三千錢絕無矣食屋上瓦松每斤賣二百錢後至一千二百無有矣糞堆中子燥肥白寸長積一二年者愈多悉掘食之食盡食膠泥有騎馬者過群隨之拾其新下糞炒淡黃色用水吞之

二十四日辛酉婦女街頭賣藥酒

人食藥材面目浮腫用甘草廣桂煮湯飲之立愈色如黃酒一文錢一杯

二十五日壬戌安留報粳米起獲四十包

安留揚舉人家僕報通許劉生員避難曹門內書院前蓄有粳米黃推官親至其家搜屋後厠間四壁實壘果獲四十包每包八斗送巡撫二包餘昇至城上將校人給三升兵三合煮湯以延殘喘

二十六日癸亥陳總兵雨豆數夜

二十七日甲子仍雨豆

總兵潛令人以黃黑豆撒街衢及空閒處次晨餓民見而拾之群相訝曰上天雨豆救我殘黎有拾至半升者

二十八日乙丑獲張賈客茶八百包每包七十觔一車夫報理刑廳張賈藏茶甚多往視之獲八百包每將弁先給十斤兵一斤以滾水漬去汁曝乾爲末入麵少許作餅食之或食葉及煮食亦可

九月初一日戊辰城中白骨山積斷髮滿地路絕行

人神號鬼哭天日爲昏

間有一二人枯形垢面如鬼魅棲墻下敲人骨吸髓自曹門至北門兵餓死者日三四百人夜則城頭寥寥處處鬼叫官府與諸郡王將校旦夕北面而哭黃推官製絕命辭三十首

初二日巳巳客將謝廷璽領大社殘兵出城援賊巳時點兵未時收兵並未見賊惟右翼程丹領南人尙近千入日夜登城北望號泣枵腹之衆焉能負戈

初九日丙子生員張爾猷掘麥一窖計三十餘石城頭奄奄殘喘不能動履者聞之色起謂性命可以再延須臾也

一老農住曹門下藏麥一窖張生員訪知之而不識其處乃至其家謂曰汝有麥不敢賣不敢食埋之何爲我爲汝起送城頭活官府郡王功甚大更爲汝留少許自食老農點首曰埋在竈前張生員開窖先以六斗報黃推官請委官驗起一郡王誤聽六斗爲菘豆菘豆磨粉最佳推官令鑿取數升

作粉公用盡發之得三十二石送巡撫一石守道五斗諸郡王將弁分食五日

此第三次闖曹二賊合圍汴步賊十萬馬賊三萬每一賊有馬三匹脅從之衆近百萬
十四日辛巳夜河伯震怒水聲遠聞
十五日壬午黎明水至城下西南賊俱遠遁東北賊溺死無筭

十六日癸未水大至黃推官坐城下壑與張爾猷抱土率兩營兵塞門水從隙入勢不可扼推官登城

壑領家丁數人於甬道上紮筏甫完水聲如雷衝開曹門水高丈餘進門輒南下壑距門未五十步倖免遂乘筏至輓軸灣復從問道涉水登城請黃推官速移居因新署在城門上爲甕川門已衝去倘甕川一陷衙舍俱陷曹門北有舊署三間在城墻實地可速移之壑復歸家紮筏黃推官夜半方移移未畢已陷矣僅攜其孥出衣物食用及二婢俱沈是日南門先壞北門衝開至夜曹門東門相繼淪沒一夜水聲如數萬鐘齊鳴

十七日甲申黎明滿城俱成河漢止存鐘鼓兩樓及各王府屋脊相國寺寺頂周府紫金城惟壑所居工街乃夷山頂水及門基門內皆乾地避水者滿集壑乘筏上曹門中途被風阻回

十八日乙酉壑復乘筏上曹門中途落水幾死黃推官遺善泗家丁李用柳體直過河請救泛一木水上三晝夜始達土堤監軍道王燮得推官手書連夜督二十餘船自乘小船從北門揚帆直入高巡撫黃推官各乘舟到紫金城上見

周王抱頭痛哭遂請 王北渡官眷五六百人同行
百姓有在城頭屋角樹杪者俱漸次渡過河北柳
園煮粥食難民墜二十五日始得攜妻子乘筏至
河北噫此古今未有之苦古今未有之厄也
闖曹發難逆惡滔天屠名城殺豪傑所至風鶴或
棄城先逃或一二日而失守或三五日而旋陷惟
汴梁七晝夜恨攻安如磐石二十晝夜對壘斬馘
不少五月圍困萬死一生猶能一心鎮定百折不
回萬苦備嘗錚錚自信者濟濟有人焉今汴梁已

成澤國夫復何言

崇禎癸未九月初二日大梁李光壁述於金陵旅次

附題叙邸報

崇禎十年十月日江西道監察御史黃澍

題爲守汴爲古今奇苦敘功爲鼓舞微權乞速覃
皇仁廣勵忠義以作後來榜樣收未散人心事云
云丙云貢生李光壁生員張爾猷或提兵城下或
巡緝賊頭要皆萬死一生與臣相依爲命者可無
分別優敘以示勸乎本年十一月初七日奉

聖旨汴城堅守不屈文武軍民忠義可嘉前諭作速旌敘何至今未行這本內有名各員併黃澍任濬通行議敘奏奪朝廷褒忠酬勩典宜優速以示風勸該部卽與覆覈不得再稽

兵部覆請崇禎十五年閏十一月十九日奉

聖旨敘功必繇巡按取其詳察確知今汴城事局變換追核殊難黃澍事內身經其言可據着卽照本議覆俟蘇京疏至再行參稽覆敘兵部一本守汴爲古今奇苦等事

崇禎十五年十二月二十七日奉

聖旨守汴文武各官及鄉紳舉貢人等勞辛備至忠義可嘉宜與敘賚特典以昭激勸高名衡加兵部左侍郎病痊起用仍賞銀四十兩任濬實授京堂起用不必加級黃澍王燮已經考選候俸滿日優陞京堂各賞銀三十兩梁炳授三品鄉銜致仕賞銀三十兩蘇壯加二級吳士講于新任加一級各賞銀二十兩蘇茂灼彭士奇加贈二級廕一子入監讀書陳永福加職二級賞銀三十兩陳德加職一

級賞銀三十兩譚國禎十八員各加實職一級無
實職者從小把總加授楊銓朱恕俱授七品京職
李光璧選授知縣張爾猷功貢優選吳之琮加級
改授車登科謝廷璽復原官承奉曹坤司禮監優
敘

原跋

已後兩篇皆鄱陵梁侍御重梓城守日志跋
辭侍御未曾身履行陣所論車營之計與日
志意見不合然亦足徵前輩立言質直無私
不肯隨聲附和也

都門舊書肆中偶見此冊其原序已失餘有銜
名係仲霖黃公題也予脫汴阨二十有三載洪
濤惡狀時入夢間對此蠹編愴然有感李氏固

德黃公甚獨搜糧之事予亦願頌德焉蓋壬午之六月廿七日黃公會至予寓正所謂勸諭賣糧時也先府君濬一公詳言邑破入城狀見今家口頗多饗殮難給廳役驗糧者謂困中之麥不足三十石蒙慨然捨之而去未浹旬而糧廳彭公至矣其衣貌頗類長者乃親閱斗數竟欲均取十一石據云取半以給兵留半以養民此憲諭也更有見價先府君哀辨過激雖不怒亦

漠然如不聞也此後始圖窖藏至八月初每夕密出四升以二升雜白米黃著牡丹皮乘夜亟爲屑用充次午之一餐計予腹日可受麥兩合耳先府君必取二升手付蒼頭令匿袱中且窺避搜括者在給先八叔蓋叔家絕糧已月餘其寓相去尙里許也中秋日院司道府會議周王府曹承奉言昨盡盤倉厥畧充俸糧至十月一日更無一粒可支矣相視皆掩泣然予家之麥

本可延初冬乃混同土著漫被強分嚮非浮河
而出計至九月二十三日我家與叔家一十餘
口當同作餓孳夫死一也若不得效死於城破
而誤死於食盡將不彭公是怨而誰怨哉

皆

康熙三年歲次甲辰三月十五日梁熙書於京

邸之心遠樓

又跋

天水郭給諫克昔在垣中曾見決水灌寇之議
因嚮予以諮其詳予謂黃河之沉開封天也闖
寇則有智伯攻趙之舉而水勢不從至於決灌
寇營或有局外之條陳非城守者所與聞也予
於壬午六月十五日登上方寺鐵塔之最上層
見黃流東去漫漫如舊其南來數渠爲自成所
督挑者承映日影明滅如線賊騎蟻聚蜂攢往

來相視卽援兵且何能一人到南岸乎嚮使城內車營果可以北抵河干自援兵南視當不異螳臂奮轍孰肯策一旅同置死地乎在黃公矜張憤激勢若必行用以鼓閭閻同仇之氣消徒兒內嚙之萌亦不可謂非勝算也若夫輸攻之智愈狡而巷戰之志不衰則賊計自失耳蓋辛巳春自成因洛陽兵變而襲其城此流寇陷府城之始也其氣驕甚謂汴梁可一蹴而破不意

流矢傷其目旣不得射者之主名遂誓屠開封以雪其痛且營賊皆倡爲俚語云開封破時雖茗蒂亦定剝三刀語旣播傳販夫竈媪咸爲咋舌慮焰日熾人知必死此三版可沉鎮營之所以一卒不貳也予嘗怪夫中州爲輿地通衢沉城爲滄桑奇變耳目之前傳聞多有失實卽此編車營之說豈不啟坐失事機之疑予故因給諫之言再爲縷書俾覽者折衷予言得以不沒

枕戈者勞苦之情事足矣

嘗

康熙乙巳季秋望後鄢陵梁熙再跋於鞏昌公署之霜霽閣

跋

此書舊有刻板歲久漫漶欲重梓之未遑也

甲辰三月

侍御鄢陵梁先生得一本於京師慮後世不知大梁守城之苦與受禍之慘又恐

先君子忠義才節淹沒無聞遂梓以廣其傳閱二十餘年至乙丑歲不肖始見其刻捧讀而泣夫侍御與先君子素無交徃特以同在圍城信爲直筆故不吝表章如此不肖守先人遺刻而忽焉

廢置將何所逃罪於是掇拾殘簡重付剞劂且乞
侍御序以冠之庶幾此書可以不朽矣然先君子
曾有遺命云係病中草草未遑修飾倘後有君子
代爲文之俾能傳於久遠則吾且感德於地下不
肖恪奉此言常以語人率皆遜謝歲已巳四明
證山周先生客杞見此書大息曰是可傳第未文
耳欣然刪訂數易稿而後無憾嗚乎先君子以
一諸生與同事諸公左提右攜力抗闖熖卒使危
城不辱賊手若非忠孝至誠可以貫金石而光日

月何以梁侍御重刻於前周先生刪訂於後皆不

待不肖陳乞而感動如此也書成周先生手錄一

卷易名曰守汴日志不肖捧讀又復泣下復乞一

序再付剞劂當年初刻時原名汴圍日錄梁侍

御重梓易爲城守日志較原名爲文矣周先生

易今名又覺文而切當今而後此書爲定本而

先君子真可以不朽矣嗟乎在兩先生留心世

道固非市德於不肖而不肖心銘此德實沒齒不

能忘也已

康熙歲次己巳嘉平之吉不肖男鑾沐手敬識

跋
是書乃

先王父病革口授

家君受而敬梓之是時淦猶未生也戊子撤棘後

見此書歷年已久舊簡將敝而

家君幾耄力弗逮也重爲較刊聊以誌

祖德於不衰爾 峕

康熙戊子秋菊月重陽後二日孫爲淦敬識

跋

李氏舊居北平前洪武初年遷汴傳至鄴七世

祖中憲公諱應元嘉靖丙午舉人癸丑進士由戶

部郎中出守山西太原府八世祖贈通議公諱似

梓由拔貢任文華殿中書舍人以仲孫光座中順

治己丑進士仕至雲南提學道江西按察使司誥

封如其官九世祖贈廷尉公諱榮前萬歷庚子

舉人以仲孫錦中順治辛丑進士仕至大理寺正

卿誥封如其官十世祖廣文公諱光圻前萬歷

戊午舉人任山東膠州學正與 十世叔祖縣尹公
諱 光鑿爲同祖兄弟共居一宅少同硯長同攻舉
業兼習武備適明季流寇之阨圍汴三次縣尹公
分任城守之責身冒矢石萬死一生如志中所云
作餅餌以給軍取氈被以禦寒 先廣文公實陰
助之恨汴沒於水績用弗成並不樂居佐守之名
焉嗣後縣尹公述守汴始末爲一書諸名公先後
梓之至

國朝崇祀鄉賢各

憲臺及諸親友惠贈詩詞又刻

成崇祀錄一書用光家乘惜歷年已久二板多有

殘缺

鄴

太高祖

諱

近董歲貢生貽贈浙江西安

知縣 高祖父

諱

維嵩康熙丙午舉人任浙江西

安知縣

曾祖父

諱

懋勳康熙乙酉舉人任江西

興安知縣

祖父

諱

方泰雍正丙午副榜己酉舉

人任甘肅靈臺知縣

父

諱

公讚乾隆己卯舉人

候選知縣每有重刻二書之意惜有志未逮近三
十年來開封屢受黃河之害崇祀錄板已無存守
汴日志板殘缺更多 鄴手錄一冊久藏行篋今奉

差來滇公事少暇檢較付梓亦企 先縣尹公守

沐之功不至終沒於天壤云

道光六年季夏族裔孫 開鄴 書於昆明旅舍



